

師
竹
齋
集

師竹齋集卷三

蜀綿李鼎元墨莊氏撰

丁酉至癸卯

古今體詩八十八首

祝芷塘先生邀余課讀卽席賦呈

聞命欣同木遇春師門誼合邈傳薪敢將薄植誇長技
更望良工琢賤珉深水涉來方就淺故書溫罷始知新
從今誓不離函丈閉戶焚香謝軟塵

庭樹呈芷塘先生

一樹清風想杏壇童童高蓋蔭闌干侵晨雲接西山黑
薄暮天臨北斗寒烏鵲不離苔砌啄鳳皇時傍井梧看

季孫自許勤封殖君子何勞詠素餐

雨塌屋角口號

糞土誰教築堵墻淫霖端欲變滄桑不堪夏屋泉聲逼
況是秋風客恨長驚鵲難憑棲樹穩呼燈先爲救書忙
一身雨立三更黑倉卒空憐石火光

良鄉送雨村督學廣東和留別韻

有師西向陝中行

芷塘先生督學陝甘眷口將行

兄又東征記海更似

栗孤身惟自重如雲從騎爲誰輕關山迢遞雁難問霜
雪清寒烏易驚一夕良鄉將別酒不堪腸斷可憐生

喜鳧塘舉孝廉

絲綸閣下報題名喜唱秋闈第五聲
好待春雷花共看
預愁冬雪騎孤行
新詩和我曾污壁
皓月遲君不夜城
二老歡情鄉黨誼
幾時對榻話三更

獨居

燕臺久客仗居停
送盡親朋戶獨扃
憂金苦無堪掘雀
焚膏偏少可囊螢
長愁對書虛室白
一笑乞隣誰眼青
醉飽便歸歸便臥
被中陰誦讀殘經

戊戌

喜鳧塘至

望子能來又隔年
父書跪讀喜平安
洗塵初市羊兒酒

遶砌新栽鳳尾蘭
惟食忘憂空向熱
易衣可出莫愁寒
謁師訪友尋常事
次第爲君注說難

蒙 聖恩授庶吉士恭紀

許從 中秘讀藏書 聖主掄才到散樗
敢道文章能報國
濫叨姓字入傳臚
鳳皇未肯離金井
雲日長教近玉除
猶幸八閤碑家澤在瀛洲珥筆拜恩初

庶常館恭賦十六韻

聖主儲才地 皇恩養士年
近城期面壁 扃戶學參禪
畫棟棲雲日 雕楹列豆籩
計人還析屋 授館卽分廛
雪淨開窗牖 霞明爛几筵
歲支河漕米 月費水衡錢
賦手

推揚馬工夫擅木鳶良師經 御簡好友盡時賢課席
珠璣錯吟壇錦繡纏滿堂聽鳳翽章服耀貂蟬沈宋看
前輩蘇頌張說結後緣頗能文字飲那吝短長篇砌馥
芝蘭露庭陰檜栢烟有花皆智慧無樹不貞堅體制尊
三舍聲名重八磚瀛洲徵盛事端賴筆如椽

平定金川雅二篇

謹序

皇上御極之四十有一年泰階平風雨時普海
內外罔不臣妾惟彼金川小醜跳梁彈丸負固
王赫斯怒 命將出師破平勒烏圍噶喇依
生擒酋逆僧格桑索諾木永息西患在 廷儒

臣抒誠獻凱各奏爾能體兼衆長雅音獨闕

臣

以庸陋濫列詞垣竊惟自古帝王戢暴安民申
命用討典章具在文獻可徵故虞有三苗夏有
有扈殷有荆楚周則伐西戎平淮夷凡選徒命
將莫不形之賡歌用揚威武揆厥體裁則大小
雅章尤爲正始吉日韓奕江漢常武諸什炳炳
琅琅盪人耳目然則歌一時之盛功紀無窮之
偉烈固莫如雅

臣

伏見我

皇上自臨御以來

乾綱內斷神武不殺平定準噶爾回部拓地二
萬餘里中間平苗逆平臺匪金鼓一聲四方響

震茲復平定大小金川獻俘告廟行賞圖

像廓清之功睿筭之勝超前邁古無與比隆

臣不揣櫛昧謹撰平金川雅二篇俾天下後世
知將軍臣溫福阿桂之奏凱皆由我皇上神
聖英武指授方畧所致名曰小金大金耆猶詩
平淮夷而名江漢也其辭曰

金川迢迢冉駹之遺蠻觸蝸國漏天一支胡爲蠢動
綏之愈悖無信恃險負固兩世

天子曰嗟是不可赦我疆我民流毒滋大爰咨于朝
爰選于衆天子曰嗟福其可用

帝曰咨福汝往視師師克在和匪斧鉞是資 帝曰咨
福衆志成城攻地在力攻心在仁

如蟻門穴如虎負隅將勇無險將智無愚 帝曰咨福
惟汝任重黑子彈丸是擒是縱

福拜稽首受 命于 廟旣禱旣禡如熊如豹旅勁八
旗氣作三鼓肅肅軍容視我巴圖魯

越晉度秦乃入劍門幕賢有佐道頌有聲成都旣北灌
口旣西遠耀邇安若旱望霓

次于雜谷雜谷來庭烹羊宰牛以犒以征頑兇肆狂鋒
蝟斧蟬以螢競月以燭爭陽

師進巴朗是角是犄是斯是鉢是礮是矢虎士桓桓鶴
列連連無峻是山無巖是關

師進資理竹破數節人奪我聲天奪其魄游魚在釜或
泣或烹窮獸在圍或伏或奔

千尋雪嶺一鼓躍之萬仞寒碕一鼓落之嶺旣登矣碕
旣平矣鼎鑊遊魂誓莫憑矣

突豕竄隣棄親罔顧蜂虿有毒梟獍無父捷聞 天子

賜出 上方福拜稽首我武惟 皇

右小金十一章章八句

蠡爾大金寔爲禍首怙惡不悛復爲逋逃數 天子曰

嗟是不足憫如農去草務絕根本

猘狗善噬妖狐善媚卒不戒嚴將星夜墜 天子曰嗟

彼貫常滿一怒增師元戎再 簡

帝曰咨桂汝終視師師是金人是翦是夷是翦是夷毋
曰漏卮草木爲妖霜雪萎之

桂拜受 命飛章于庭旌旗收色壁壘載新桂拜受

命機參 廟筭三面合圍疾雷閃電

進據谷噶其衆如雲陰襲其後天上下將軍進據馬尼
其碣密樓星飛火毬爛額焦頭

奪羅博瓦天狹一線礮落尸飛刀橫血濺奪色溯普厓

削路阻雲間出梯賊墜成泥

繩橋過矣草布破矣鋒銳烟消莫予挫矣其胆旣破其氣斯餒徒御揚揚長驅宜喜

宜喜哉哉俯瞰其窠人不滿百且哭且歌且哭且歌罔逃矢石天固無階地固無隙

搖尾乞憐如犬如豚此豈可宥匍匐軍門數之戮之桎之梏之繫頸獻俘終焉族之

帝曰來歸壇墠是除禮成郊勞 告 廟如初 帝曰

咨桂汝力惟輸爵汝上公其克相予

西患旣清豐年穰穰四方來同四方來享濟濟師師圖

畫凌烟 皇猷允塞于萬斯年

右大金十一章章八句

偕館中同年各賦四時一物一韻至七

燕秋藏春見謗主飛銜泥慣纔語畫梁又歸花甸輕風
翹偶斜細雨聲微顫不欺百姓人家最怕吳王宮殿社
前社後綠陰齊啄破秧針穿柳線

扇清心便面却大暑收微汗燈影頻搖篆烟輕散難消
夏雨容易起秋風怨恰宜名士思沉最愛美人情倦羅
衣露坐月團團侍立小童勞夜半

桂味辛粟細廣寒宮秋深第天外香飄人間名貴冷露

濕無聲微風吹有涕只容高嶺松陪未許長安薪替
山片玉抵一枝盼捷嫦娥愁不寐

雪清寒皎潔粧玉臺繪銀闕花落無聲梅開有節長疑
不夜城錯認無邊月臥深山裏高人冷到塵中富室老
農閉戶說豐年麥根暖透融融屑

己亥

移居香爐營

時父母大人攜全家幼弱將至

適館經年沐聖恩未營巢窟稱孤身也知俸薄愁甘
旨不忍家貧累老親架有詩書非腹笥材歸輪輻是勞
薪卜居先卜傳經舍好向芸編覓替人

長新店迎大人入京

趨塵犯曉走桑乾心上離情膝下寬車馬衣裳徐振頓
弟兄妻子慶團樂游魚隊隊迎春水歸鳥翩翩集地壇
宣武門東新卜第夜來侍飲話長安

燈前

燈前三老話家鄉

時其勝二伯
護眷同來

坐我南村萬善堂綠水

青山縈夢冷嘉禾茂樹入心涼一官似燕方營室十口
如蠶盡待桑不是樂天居獨易五常中有白眉良

聞車行

燕市終年人似蟻大車小車若流水輾斷緇塵通九達

轍深都類城門軌城門啟處日華新車讓車行人讓人
豈無疾遲憑馬力絕少科坎任輿奔中有煤車千斤重
泥行忽梗輪爲凍長鞭旋空霹靂飛驂騎回頭身不動
後來車急向傍開鐵籠亟鬥馳風雷轅駒爭勝皆騏驎
蹇驢避路甘驚駘眼橫那管上下轍當頭仍有重車折
左還右抽出未能人相詬詈畜相齧頃刻通衢成車市
行人尙恐立無地進退難爲意轉平登臨屢顧心疑醉
巡街驤馬呵聲高指麾羣僕如兒曹推移漸疏南北路
若鳥出樊獸出牢吁嗟乎欲速不達徒擾擾車匪自鬧
緣爭道禮讓爲國聖有經惜哉難望與人曉

洗象行

六月伏天天午辰人傳洗象西河濱舉國若狂不及飯
羣趨開口坐城根須臾象奴騎象至雲峯斷續二十四
萬人起立目注門四蹄連踏聲震地徐徐下岸岸欲崩
隊隊入河河無憑浮似六鰲駕員嶠沈如五馬渡江陵
一鼻吸盡潭中水相戲相鬥還相倚移時噴出十丈高
細雨灑遍二三里歡聲雷動各霑衣奴子出沒矜神奇
蛟龍攪海或過此鯨鯢拔浪當遜斯吁嗟靈物來有時
驂駟騏驎安得知請看歸朝駕玉輦一隻能當萬虎
貔

南西門外觀稻

我本農家子香稻舍前植離家經幾年時復夢鄉國竊
聞燕趙地土宜惟粟麥百官仰太倉多借南船力今春
玉泉東瞥見數畝碧及秋出城南雲委豐臺北故人別
久逢親暱勝平昔徘徊不忍去所愛非粒食愛此田中
廬似我南村宅

法源寺觀菊

我性愛邱園嗜菊甚於陶所至必盈圃人淡秋益高往
在涪江城及門厲清操遍地敷黃英興至傾濁醪邇來
走緇塵此味棄如糟列市門新樣排繁徒抑騷種雜或

師竹齋集

卷三

九

類惹苗孤多借蒿矯揉以娛人生趣何太勞偶憶法源
寺禪房碧周遭剪剔傭花奴灌溉聞桔槔偷閒攜子弟
避俗辭喧嘈入門鐘梵靜商氣鳴松濤遶徑立踟躕蕊
綻金猶韜頗怪老僧私預遣佳色逃無花樹亦好況有
竹飈飈感此懷醒園西望首重搔

庚子

悼亡詩

鏡破采鸞飛沙寒孤雁宿殘燈耿不明窗草萋以綠痛
哉泉下人滅矣風前燭埋愁愁斷腸忍淚淚盈目憶昔
初結褵卿年剛十六匪惟工容妍尤愛性情淑善承父

母歡能令妯娌睦齊眉孟光賢如賓邵氏肅日望夫壻
貴每就大士祝剪紙授兒字紡績佐余讀公車別幾秋
內政維汝督往聞病膏肓求親秘簡牘意恐亂方寸庶
令竊微祿高義動鬼神善言當符籙大難旣不死偕老
差可卜昨歲遣書迎臨冬始命僕椿萱安版輿芝蘭秀
砌玉宦淡勝糟糠養薄猶帛肉正好坐調琴豈料室棲
鵬嗚呼天殤悲已矣年命促修短難問天輪迴枉佞佛
生似太常妻死惟奉倩哭露冷怕臨階月殘愁入屋廿
九歲光陰五千里燕蜀靈輻幾時歸墳墓何年築茫茫
眼望羊營營心逐鹿最憐孤尙幼難免絃再續灑涕滿

空帷百憂紛來觸

散館蒙 恩授職檢討恭紀

盛世儒官重翰林三年歲月正駸駸鳳樓阿閣增丹采
日照瀛洲見赤心自信才華慚鼠璞敢將討論竭蹄涔
承 恩尚冀涓埃報 中秘藏書舊古今

同年邵楚帆

自昌

馮玉圃

培

祖舫齋

之望

散館改

授部曹色微不豫詩以慰之

君等才眞一世雄豈宜長作蠹書蟲卽今學士多黃髮
自古郎官應紫宮除却詞章皆實政好將報最答宸
衷頭銜新換尤堪羨失馬何妨問塞翁

判官行爲同年蔡汝嘉明府

必昌作

仙客說天堂瓊珠爲宮霓爲裳釋家語地獄極樂世界
西方足簡子明皇夢已虛閻羅殿陞定有無升天入地
果有路佛經罔用長安度我友蔡侯性奇詭未判生民
先判鬼席前百計誘之言守口如餅徒唯唯酒酣衆客
談陰曹疑神疑鬼聲嘈嘈蔡侯旣醉癢難磨一麾衆論
忘其豪爲言鬼狀刻千變魍魎魍魎非其面陰刑酷過
世間刑年來我亦見之慣猶幸持法最公平絲毫不許
枉魂靈輪迴果報無今古福必其善禍其盈彼雲無縫
鳥飛入彼水無隙魚聚族鬼行土中不見土如人在塵

塵不覺又如平川初種樹掘之坑之層成墓及樹十圍
根百圍土仍不見無容處一氣幻化何不然五行生滅
揔無偏高岸爲谷谷高岸桑田變海海桑田古來但說
鬼能哭今日纔知鬼正樂美人月下抱衾裯才子江頭
賣金玉諸君亦與鬼同情世上無非鬼暗行白玉樓前
李長吉芙蓉城中石曼卿惟時坐客盡傾耳如聞萬鬼
撲窗紙銀燈閃爍夜雨來牙籤歷亂陰風起嗚呼蔡侯
論最新一切誕妄都成真判生判死無二理憑君傳語
世上人

二寸身形三寸臂
鐘條戚施兩不倫
輪囷靡腫稱腰腹
孟賁烏獲莫能伏
頗憐元亮賦歸來
翻爲五斗折腰回
更憐漢庭強項吏
不俯何庸手據地
深閨案拭生光
兒童奉汝坐中央
輾轉反側空俯仰
一笑爲爾成開堂
我時從旁嘆其妙
若逢桃梗定相誚
世間遊戲豈徒然
須知尾大原難掉

辛丑

讀荆軻傳

事敗燕固亡事成燕亦滅
謀國不自強謀人復何益

卽目

鵲啄空庭粟眼流心自疑見猫忽驚起啼上最高枝

燕臺小詩二十首

門簿

檢點緇塵友今年幾個存路人渾不識錯認是龍門

小刺

刺大僅容名居詮紙背清小童初問字識否未分明

門神

何來小丈夫傍人門戶歇夜夜推出門形影弔明月

坐褥

褥小僅容膝入朝攜个个何事僕僮忙官階爭一坐

春帖

春色上門楣雙紅挂綵旗太平頌聲遠海內一宵知

諭帖

硃墨亂題巾公然令五申送窮窮不去何用嚇比隣

封條

人道京官苦我言樂有餘身閒無個事告勅要親書

火判

七竅自煎熬寒森帶月飄如何判陰事心火未全消

響竹

破竹剛三尺響動百蠅忙寄語作詩人驅讒固有方

蚊帳

遠害無多術藏身在一床只愁藏不密風火費商量

蠅拂

揮塵足風流蒼蠅擾未休眼前除不得何暇爲人謀

風門

乍啟旋教閉塵緣斷此中可憐一片紙妒殺朔方風

冰嬉

履銜一片鐵滑鞬勢如飛君王恩賜厚不敢愛雙腓

冰床

恰受雨三人推行不容緩不怨北風寒只怨東風暖

冰燈

層冰鑄作燈未許狂風滅寒心欺燭龍通宵紅不熱

冰花

鏤玉成春色春心一點無海南人不識道是白珊瑚

冰山

薰風吹汝寒寒骨那能堅翻憐人向熱不信是冰山

冰窖

此地卽寒谷東風吹不溫最憐當夏日寸草也無痕

口琴

寸鐵響何清如絲帶肉聲小童無遠志讓爾獨錚錚

鑷子

修容少婦宜鑷白老翁尙怪爾奏多功不離人面上

偶成

全家三載住春明菽水齏鹽味最清閱世輸人唯有讓
知交論古莫嫌爭閒栽花木關經濟倦把詩書敵酒兵
白足緇塵僧挂錫京華誰不愧官名

除夕

爆竹聲聲歲奈何停杯聽唱蹋春歌室憐新婦賢無少
座愛雙親髯未皤繞屋香來花供早催租人至酒傭多
身閒宦冷三除夕至樂家庭只守和

壬寅

西河宅後四時詩

西河小徑帶高城宅後春光最有情日出牆頭觀騎射
雨來桑外聽鷓鴣更宜鳴汎秋霜白恰愛蟬嘶夏木清
多少詩題吟不得一冬冰雪月盈盈

通惠河紀游和芷堂先生韻五首

山水何必奇所賴會心遠日溷緇塵中煩殆轍輒得
水已足喜况乃聞重槌奔流歎輕雪密樹圍高堰水草
塞其間舟過肯爲偃客羨鷗鷺閒天放魚鳥健錦纜未
須人疾用一驢輓此勝最清心每游輒忘返

忘返復何之東望雲悠悠銀漢淡無際蕭然寫清秋有
城高如京在濱曲而幽阿兄官其間天庾輸莫愁雖非
吳越鄉已稱仙吏儔千櫓集河干萬斛俯岑樓日偕書
侍郎麟檻坐同監收太平倉廩足玉粒成山邱

山邱積如何年豐政易美每念同心人盈盈隔帝里
時復遣長鬢扁舟迫城艤朋簪多雅興結伴常止止訪
戴子猷同御李慈明似至則秉燭游飲惟文字喜作吏
風塵內茲樂能有幾永言膠在漆莫逆石投水

投水見交態臨別常耿耿遠送偏橋彎荻蘆沒檣影匪
惟各公事荒忘少佳境好風蘋末來宿醒乍爲醒瀧吏

強解嘲要路戒酩酊數椽覆茅茨霜露佐清冷大有蕭
湘致天水相與永將歸又遲暮漁戶拾笊簪

笊簪亦已拾天地寂萬籟蟲聲間流聲灑落塵跡外野
澗星愈繁雲淨月偏大無限秋士悲都瀟水一帶徹夜
語忘倦曙色漸青靄遠寺來鯨鏗朝陽上鴉背十日縱
歎留三宵已良會何以紀勝游摩詰詩如畫

七月中雨村以盆桂黃酒見寄并示疊前韻詩始
知芷堂先生曾以詩索桂鼎亦波及因有感焉

再和五首

自作游谿詩益覺谿非遠路識行蟻折心逐壑蛇蜿每

念輒在目直達孰爲健不可無波瀾竹節狀隄堰何人
興最高醉歸未肯偃郵筒效元白筆力鬥剛健催詩如
催糧銜尾要輪輓文真翻水成有往無不返

不有物波及誰知詩興悠對花旋自斟香滿一院秋孰
云塵市囂頓覺庭砌幽菊蘭況爭芳蝴蝶先解愁歡迎
兒問名奔走僅呼儔老母憶舊園嬌妻俯危樓物罕固
足珍品貴方見收豈無秋海棠委之在荒邱

桂亦何足珍酒亦何足美庭樹與家釀見慣思故里自
從竊祿後身若舟暫艤欲行難空行將止慮徒止富貴
浮雲如滋味雞肋似那禁萼羹思便聞足音喜譬彼樹

離鄉縱開歲能幾萬事眼前花一笑付流水

我兄抱清癖介然性孤耿獨有愛花心不減附身影名
園抽妙思凡卉造奇境載蕙或興謗啜醪未爲醒適意
在杯杓何必定酩酊情親迹疑疎腸熱語嫌冷佳色供
時玩先慮香不永得魚莫忘筌網戶重答簪

谷風何習習吹萬作天籟落葉何蕭蕭不在谷風外爲
樂安可極所患正無大儀多要及物道存不下帶漫言
秋聲厲絕勝春氣靄濟施苟未博恩怨一分背歡感自
今夕棖觸憶前會惟餅能充饑幸毋示以畫

癸卯

雨村以事繫保陽獄除夕用東坡和子由韻二首
見寄却答

殘冬奔走入新春肯爲先生惜此身心到極難惟搶地
事經無奈轉容人也知韓愈非求佛所賴臯陶是理神
兄實子瞻弟慚轍擬將官贖恨無因

煅煉風傳颯已淒呼天無路首重低猶田一望多媒雉
護子偏憐少伏雞不死定求耶午父如生漫哭杞梁妻
報君機事君須記佛渡長安澗水西

雨村譴伊犁出獄仍用前韻見寄再和
報到新年有好春那期還是戍邊身縱離黑獄仍尊吏

已筭青天特赦人心但無慚休避客罪如可憺且求神
伊犁萬里談何易見面先愁說往因
脫君縲紲淚淒淒見說投荒氣倍低絕塞難憑蘇武鴈
虛窗誰共處宗雞最憐遠道無僮僕况復衰門有母妻
且住近郊容再計忍令垂老出關西

壽雨村五十和芷堂先生韻

覆盆打破得歸日舊巢已見人入室胡獠散盡床頭空
不死幸存肉與骨潞河書院君手建本爲人謀非兔窟
倉皇翻得一枝借爛醉熟眠謝簪紱出山頗怪雲不飛
投林尙覺鳥難必豈爲泰岱思鄒魯或緣天姥夢吳粵

舊厯雖佳買錢無宦囊况被贖鍰罰我曹不出則須處
六轡在手惟按節先生閱世五十年見慣繁華眼一瞥
岳不讓塵因以高河不擇流故難竭架插圖書千萬卷
校讐矧半付梨栗有書可讀子可教如君那復慮磨滅
苦語壽君應首肯舌爲柔存劒剛折醒園花鳥正相憶
歸與莫溷禪中蟲

樹杪峯頭挂落日呼僮挑燈坐斗室好書異畫困手眼
痛語快談沁心骨幾忘窮鳥在樊籠已見明蟾出月窟
此時爲君畫歸計第一先賣舊纓紱監河斗粟未可知
故園薄田尙堪必何須芰荷佩三廬罔用珍珠炫百粵

黃冠草履居鄉宜破帽蹇驢聊自罰采食得美釣得鮮
入門無定出無節名山事業正須忙石火光陰纔一瞥
君今五十目已眊井水過甘容易竭不見子安與長吉
三十未度主先栗善養餘年體自胖縱教厄運名豈滅
大海翻身大智慧無才百歲同天折我坐無田歸未能
一官自笑毋乃強

師竹齋集卷四

蜀綿李鼎元墨莊氏撰

甲辰古今體詩七十首

出都

微祿雖云養空文不救貧那堪羈宦子又作遠行人故
里歸何日天涯寄此身殷勤餘兩弟菽水共艱辛

麗庄

離京七十里別腸一萬周親老兒女幼俯仰懷百憂豈
無好弟兄機雲住街頭豈無好官階鷓鴣爲匹儔胡爲
觸炎蒸火雲燒薊州睡龍鞭不起社鬼方嬉遊起視旱

地苗將槁愁無秋何以救蒼生升斗尙難謀百穀仰膏
雨一飽真易求嘆息愁茅店身世何悠悠

保定府有感

并序

余甲午北上攜姪觀兒同行痘殤於此今來覓
其塚不得故有是作

荒原蔓草碧無情舊夢重尋記不清只有慈烏知客恨
巢邊故作哺兒聲

渚沱河

流沙滾滾瀉銀河多少行人喚渡過怪底漁舟呼不應

京兵卽日渡渚沱

時進剿逆回
蘇四十三

平鄉縣簡韓三明府

詩

活水一犁黃田家孰晚秧驚心懷故里有宰是同鄉村
樹團雲直山花帶雨香願將生物意作頌上琴堂

義烈泉

并序

義烈張氏者平鄉張茂才之女知書識禮長適
趙廉能蕩業無賴誘氏賣姦不可羞且忿誣氏
出之氏含冤大歸忍待夫悟後趙貧益甚思賣
氏自活復訟氏父於官官廉察其實斷離之氏
本欲終爲趙家婦冤雖白身無歸遂投井死官
爲表其閭名其泉曰義烈嗟乎死有重於泰山

有輕於鴻毛使氏當被出之時死則貞淫之名
疑信半叅矣當斷離之後而不死則貞淫之實
又疑信半叅矣輕生畏死兩失之道惟始則隱
忍繼則決烈有君子相時而動烈士從容就義
之槩焉因樂歌其事以風世之死義者

生死有重輕不關恩怨情貞淫有本末不在毀譽名吁
嗟趙家婦從容君子行當其被誣時義豈貪餘生恐孤
父母教戶說誰爲聽伏地忍深耻呼天聞哭聲良人死
不悟縣宰律太明不能從一終出入慚影形古井水不
波照我心常清誓埋乾淨骨以爲我親榮烈哉死婦節

偉然存典型挹茲幽泉香底以風潔貞

齊河題壁

衣帶黃河色橋通清濟船高城連岱雨斷岸接齊烟地
僻饒雞犬民勤足布錢淳風殊可愛投筆意欣然

趵突泉

濟水伏地流沛然欲入海何物梗其間鬱怒氣十倍乘
勢快一湧雪浪疊銀鎧禹力鑿不到水府積塊壘孰令
三穴泉齊發不稍待潛鯨或暗吹蜺竅聲毋乃人但爭
奇觀吾欲問真宰

濟寧州卽事

濟寧河運接神州一閘平分汶水流天井涸時淺夫怨
糧艘多處楚人睎南池小泛知章酒北斗高懸太白樓
風景不殊詩好在鳴蟬依舊晚涼秋

手車行

卽古羊頭車

一夫挽車手不動勢如轆駒脊高聳一夫彎腰肩一繩
又如驂馬踏層冰七月雨集泥滑滑鳩婦爭啼蛙亂聒
我時局促坐東邊西以倦僕蝨其間忽然欠伸墮可怕
人與行李相枕藉無才自應辱泥塗野老相笑還相扶
起來振衣藉草坐日薄西山敢言餓未知今夜眠何鄉
且喜前村酒旗揚呼僮疾走無徬徨與爾開懷傾一觴

重過齊河用前韻

小別纔經月重來渡此船岸添新過漲樹減舊時烟素

壁增詩句

見雨村和詩在壁

空囊剩酒錢依人真失計把盞意

茫然

泰山詩三十首

一天門

入山仍在地到此忽登天石磴盤飛鳥虹橋挾羽仙邱
陵雖俯視谿壑尙高懸不信人間世今來慰俗緣

萬仙樓

兩崖方對峙一徑恰容樓洞雨懸螭口山雲絡馬頭回

看城若近直上路仍幽
衣袖飄飄舉翛然豁遠眸

扇子巖

何來雲母扇壁立插晴空
開閣陰陽異爻涼歲月同
卽今能却暑終古不搖風
況復新秋逼淒然對晚楓

紅門

宋人得
天書處

崩石豁如門巖高不可捫
霞光明積雨壁色射朝暎
人力應難到天書豈易論
可憐開闢意斧鑿已無痕

斗姥宮

半寄懸巖上危哉斗姥宮
泉飛朱檻外樹挂白雲中
高挹星辰氣低藏澗壑風
古槐尤可愛一殿碧叢叢

經石峪

空峪咽泉聲何年刻梵經波隨龜篆綠藻帶洛書青陡
壁埋雲屋陰厓敞石亭此山真佛藏竒蹟意仙靈

水簾洞

水從千澗落斷續綴珠簾深洞雙門闢流泉一綫添響
和雲寺磬色泛海潮鹽清絕真仙窟桃源路未淹

金星亭

絕壁疑無路懸厓尙有亭俯臨千澗黑高接一天青屋
角雲常宿簷前鳥未經搖搖風欲墜只合住金星

二天門

師竹齋集

卷四

五

又上一重天紅塵竟杳然罡風迴絕巘午日挂層巔虎

踞關前路龍吟澗底泉欣聞同伴語三里復平川

過門至雪

花橋三里石徑稍平俗呼爲快活三里

御帳坪

因宋真宗駐蹕得名

君王留御帳山水有遺音石色一輪月泉聲千古琴陰雲飛去疾白日照來深無限登臨意蒼然松樹林

萬松山

不盡虬龍影羣飛落對山千行盤石骨一色靄雲鬟材大風尤妬天高鶴自閒秦封真不羨歷歷署仙班

十八盤

已越千層嶺，纔經十八盤。入天龍有勢，絕地鳥初搏。壁色青霄迴，巖陰白日寒。飄飄雲際立，法界眼前寬。

南天門

萬級雲梯盡，雙厓石壁開。門從天半出，人自地中來。翕闔乾坤象，輪迴日月催。蒼茫憑一眺，山氣鬱佳哉。

孔子厓

聖人登眺處，道與此厓尊。極北連燕塞，迤東接海門。大觀懸日月，一覽小乾坤。萬代頻瞻仰，龜蒙那足論。

天柱峯

不畏其工觸，孤撐亦有年。蹟留前代僅

峯下有朱劉裘馬照題名靈

集此峯偏逕欲擎朝日曾經挂晚烟斗牛高絕處重得到張騫

瑣臺

臺高平玉案室小狀桓圭側望東齊近前臨北斗低風搏孤鶴上月稱一琴攜入夜雲如海蒼然四望迷

孔廟

是夜宿西廊

百代如親炙披雲拜冕旒天階真咫尺地步絕陵陬入室迹難踐爲山功易酬敢言神可格有夢到東周

大觀峯

絕壁摹唐隸登峯得大觀兒孫低萬壑日月下層巒一

氣寰中接雙眸外寬果然天下小希聖益知難

玉皇頂

玉皇天上坐頂外欲無天元氣千峯結靈光一握圓瓊樓添處處鐵殿鎮年年香案誰爲吏從當証夙緣

養雲亭

危亭天半落遠色帶朝暉一氣連滄海孤飛有白雲決決風自大渺渺郡難分何處晨鐘發悠然上界聞

秦碑

秦功何足頌遺跡尙千秋碑與羣峯峙人因小篆留風雷經剝蝕文字失蛟蚪讀譜懷劉跂空慚范及歐

丈人峯

家近青城住兒童識丈人何來東岳頂恍與蜀山親孤石空中拄蒼顏象外真驚心還再拜慚愧客中身

愛身巖

一名捨身

有身寧不愛佞佛亦何愚百丈危崖黑千年白骨枯澗深愁過鴈冰薄聽疑狐物尙防輕死人胡不早圖

仙人橋

兩崖千仞削三石疊成橋結構知何日飛昇不計朝秋來看鵲渡雨後訝虹銷尙有仙人過懸懸望碧霄

五花峯

不襲芙蓉面長開五出花寒風吹碧落秋色更清華石
疊千層翠峯藏一朵霞竒姿誰可玩萬古供仙家

神泉

半勺清於鏡山中第一泉湛兮真上善逝者卽前川淺
訝山嵐入深疑海穴穿矚然塵滓謝一滴沁心田

白雲洞

的是藏雲處幽然一洞陰滴聲泉似磬彈指石如琴星
月光難透烟霞氣易侵風來愁出路磅礴作龍吟

日觀峯

不待天雞叫來登日觀峯亂霞燒海水攢燭照神龍眼

界窮千里雲陰隔幾重奇觀觀不盡鵲立到晨鐘

西天門

立馬山頭石雙扉敞若何秋風吹客冷落日到門多鄉
夢連三蜀流沙走一河雲光何靄靄恐有佛來過

月觀峯

月觀亭亭秀仙家有石閭厓陰雲氣重洞口日光疎星
斗當頭見天河一握虛夢遊真是幻竊玉笑蟾蜍

雄縣

往時雄縣策疲騾細徑沿堤渡大河今日鄭州鞭病馬
小船索鈔阻洪波依依楊柳牽人少裊裊荷香趁客多

十里烟雲濤作雪蒼茫難問澤中禾

重九飲岳梅巢叅軍署

何堪令節客他鄉賴得良朋共舉觴
馬望岱雲馳遠夢鴈橫秋水叫離腸
十年南園孤黃菊

南園余舊讀書處

九日西

風冷夕陽拌醉如泥都忘却與君話舊興偏長

憶昔一百韻寄懷雨村大兄

憶昔初齟齬離親就傅傍性情齊陸績孝友篤黃香弱
翻爭鵬翼隨肩逐鴈行鴻心猶躍躍駒概已昂昂十歲
辭綿洛孤帆指浙杭避人攀錦纜玩水戲牙檣雅尚希
夷宅現臨杜孟鄉塗鴉汗筆札問字識文章百濮憐巴

曼荊州弔楚襄騷思摩屈子賦擬續高唐自謂山川助
誰能斗斛量孔融襟素濶項橐姓名芳倫試孫吳法私
窺賜鯉墻學書兼學劍非狷亦非狂薄視雕蟲技慚嬉
走馬場義堅欺介冑膽壯對餘艖皓月掀晴雪秋潮捲
暮霜觀濶登島嶼脫險艤胥閭宮歎館娃冷墳悲貞女
荒扁舟乘越相醇酒醉周郎虎阜談僧坐楓橋冶客觴
笙歌喧舞鶴肴核藉貪狼南國銘心切西湖鏡面光雲
中排葛嶺天上落錢塘龍井茶同喫鼃江簍共嘗勤勤
弄翰墨步步牽衣裳勾踐舊都好計然籌畫臧浣紗佳
麗產嶠浦列仙莊蕭律家家讀松醪戶戶藏朐來纔泊

艇揮去又浮航苦竹城何處嚴陵墓有坊入門徵豫悅
阿伯擅循良冰暑饒經史茅齋養棟梁晨昏偕授几風
雨總聯床倚賴唇依齒提攜網在綱寒更啼蟋蟀春港
睡鴛鴦疑向燈檠質吟於枕席商內功收尺寸外慕等
尋常差免嗤愚谷先期作智囊願如蛩負駟永若鳳求
凰小別原無恨稍疎那便傷男兒生不苟弧矢志須償
豈顧蟾蜍怨而卑鵬鶚翔絕塵必驟襄特達定圭璋垂
手輒驚足低聲引鳥吭瓚壺聽更急瘖啞語寧忘毛遂
雖敦遠應侯舌詎亡是刀宜截玉號箭合穿楊郁李固
偏反鵲鵲看頤頤呼羣棲 禁樹分背翹朝陽妖夢連

宵兆凶函遞卒將鄭階蘭忽刈賈座鵬成殃厄閨年乖
舛招魂佛渺茫衰麻嗟白羽藜榻理青箱餌驚馴之韝
降騅勒以韁運斤資宋削藻斧借吳剛錯鐵融融化頑
銅點點銅鷗雞搏溟渤鳩鶯搶榆枋拔幟千夫辟披軍
一隊當暗流知己淚敢怯壯游裝久滯艱聞道遲逢屢
見康伏瞻嘶櫪驥進笑觸藩羊燒硯霑餘瀝炊秬雜飯
糠氣惟甘解豸臂忍折螳蜋金鑑神堯握蘿圖盛
世張照淵姦莫掩造命善徐彰利器盤根別珍賢拱璧
相珊瑚搜粵肆旆旆耀重洋駕爲瓊林勸恩從杏苑
望瀛洲叨接武燕市幸騰驤撼樹虬蜉蝣歆災禾螟賊蠶

里誇遺澤厚 帝許直臣昌鎖鑰尊三輔關河重四方
遽料瓜始代卽沐 綽重揚潞葦鱗鱗碧庭槐鬱鬱蒼
趨承欣浹歡笑樂渠央陷罪波頻起危機括漫防芝
焚緣燎野石破壁爰圖束鹿苴燔醢烹雞探沸湯吏威
過刻木言巧甚調簧回紇槃瓠種伊犁極域疆此行殊
博望遠嫁哭王嬙黍谷廻鄒吹瑤環錫 聖皇兵符終
救趙甲士枉圍匡儻耳迎蘇軾殷陶侍范滂褻糗躬跼
跼托鉢走踉蹌僂輟驅東嶽君車困北邙獅巖徒悵惘
日觀獨徬徨輪自催烏兔九空轉蛭蟻投陂微抱朴縮
地少長房六鷁飛仍退雙鳧伺未遑弟兄真魯衛踪跡

自任
異衡湘聚散誠難逆升沉那易詳丹鉛多事業滄海或
田桑逝矣歧盈路懷哉涕滿眶立曾羞仗馬窮肯泣寒
蠶但奏璫笏適應嫌鞅掌忙醒園花簇簇纔舍稻芒芒
和靖供題詠陶潛任徜徉歸與吾黨佇慎勿忘垂堂

大風至泰安

深秋又到古封臺東岳雲峯暗不開雨勢遙從山澗落
風聲疑挾海潮來客因徑熟思前度主爲情親覓舊醅
憶別琴堂纔幾日西廂懸榻已生埃

留別何瑞庵明府

人麟

又作南遊客長懷東岳詩一樽今夜月萬里獨行時聚

散將誰怨來回轉自疑西湖遙憶處益動故人思

蒙陰縣

十月蒙陰道砧聲不忍聞橋流千澗雪城聚一峯雲落
葉催歸鳥游塵暗夕曛顓臾邦域地難問魯諸君

沂州府

羣峯送我出沂州沂水湯湯遶郭流萬里蠶叢懷故國
一行雁字別殘秋山樓得月無先後木葉經霜有去留
客路最愁冬日短紅塵僕僕幾時休

紅花埠

徐沂交錯處吳魯市中分已作江南客猶瞻冀北雲運

自年夢集 卷四 三
河魚信杳流水雁聲聞遊子方逾遠含愁對夕曛

登舟

僕僕風塵久登舟卽是仙秋江極天淨寒月向人圓活潑添詩趣清閒稱酒緣糧艘歸去疾何日發幽燕

舟夜

兩岸市聲靜江天清若空相看惟有月此去不爭風人意波濤外魚書浩渺中不堪寒夜永愁聽是孤鴻

虎阜

入山惟有寺出寺已無山霸氣埋千載風雲盡日閒

登虎阜塔

烟霧杳冥天高一塔青
佛前燈日月梯上履雷霆
遠岫低雲檻長江接海濱
生公呼不起遑問石聽經

清蔭堂卽事

重門曲折到禪堂
滿坐爐烟雜茗香
一局棊叅周易變
三杯酒學晉人狂
閒聽鳥語消清興
倦倚花欄看夕陽
却笑老僧忙過我
塵緣未淨日偃偃

將之松江留別清蔭堂

不爲禪堂十日留
松江又復買吳舟
寒雲羃羃山微露
落日亭亭水亂流
雙桂當秋懷故宅
孤帆何意別長洲
虎邱到處飛紅葉
屈指來春可再遊

舟中觀日出

海日欲出霞滿空飛焰燒波魚尾紅推窓一望天水濶
湖山薛澱青濛濛蒼茫不辨湖南北火輪已上扶桑東
雲開霧霽見遠樹華亭孤塔來舟中乃知昨夜月黑誤
百八十里須臾中我行萬里賞陰晦正要海日幻奇逢
昨來岱頂登日觀已嘆觀止難爲重何期此景又奇絕
始悟變態皆化工彼皎日兮應憐儂儂今正嘆如飛蓬

江村

村舍逐江流居民狎水鷗藤纏桑戶窄瓜蔓竹籬幽牧
遠林藏犢漁歸柳繫舟就中多樂事鼓腹聽吳謳

落日

落日半江紅烟雲淡碧空斷霞山色外遠樹水光中望
眼連西蜀歸帆阻北風挑燈仍獨坐隔岸一聲鴻

舟望

恬恬波浪穩輕舟淡淡山川豁遠眸水面日連沙岸湧
江心雲逐樹陰浮稻粱豈足馴鴻雁漁釣還能狎鷺鷗
極目寒烟青未了可憐風景似綿州

昇山

昇山當面橫秀色潑眉曉行舟衝腰斷碧色一江接松
柏排高岡疎如連城堞逸少肯曾登感嘆意有愜至今

清尚風流韻被茗雪我來十月尾春疑在寒葉恨未陟
其巔遺蹟空目涉殷勤語舟子莫慢理檣楫

擠船行

北船入城來南船向城住擠塞狹港中兩岸泊無處中
有大船槍插旗清歌妙舞無不爲指揮小船令迴避船
多岸逼篙難移力盡聲乾不得出小船欲覆退恐遲小
船載糧米大船載吏游吏游亦有時糧米只一秋米舟
若覆別無米未完亦國課遭誅求哀求大船退與步暫
放小船納糧去

舟中詠古五首

子游首文學泰伯初開吳那知千載後文物成名都我
有延陵劍心爲知己儲徐公不可遇俠氣徒區區等閒
未敢拭恐復驚愚夫

餘杭有二守樂天與東坡事業壽金石文章流江河豈
必皆天神詩書醞釀多恨不生同時感嘆將奈何白傅
終致顯髯翁竟蹉跎自古蜀才人處世常坎坷

武穆真豪傑一身繫安危如何大厦傾不許獨木支小
人無遠慮孰令權下移君子防未然胡爲忠見疑事後
人人智事前人人癡千古一覆轍此情當問誰

我愛鴟夷子扁舟遊五湖金鰲不受釣便逐神龍趨我

愛張季鷹挂冠爲尊鱸秋風一感激冥冥飛鴻孤嗟我
何爲者不仙亦不儒浪迹江湖中軒冕而泥塗卞和逢
玉人抱璞將何輸明妃失畫師遠嫁空煩吁

賈誼過秦論仲舒治安策誰爲王佐才我懷新建伯經
綸學中事意不在竹帛宸濠百萬師未戰已喪魄乃知
仁者勇制勝非劍戟房琯爾何爲血軍陳陶澤

烏程署中寄懷鳬塘四弟卽用其送別韻

北風動地來冀馬思燕京觸我思家念如波不能平嗟
予底常弟家計何營營父母都高年甘旨須時呈兒女
都穉弱聚讀如蛙鳴仰事並俯畜家和身乃榮庭有萬

卷書坐擁當百城胸中飽其味能令風月清曾上凌雲
賦時出金石聲小人尙機巧君子抱璞誠同輩幾人賢
擇交非不情我行歷吳越念汝數歸程昨宵團圞夢明
月來逢迎

寄紹初五弟疊前韻

江下入滄海雪上歸帝京陰陽日升降山水安得平人
生誰能閒貧賤各有營要驅俗累盡乃得天機呈我弟
有紹初三年不飛鳴安心履順適委運忘枯榮善守寧
在衆志堅自成城高歌動四壁寒暑燈月清每於雞鳴
後猶自聞書聲惜別已多日努力保寸誠慎毋邱學山

學山空復情應如川學海學海至有程破竹數節後看
君及相迎

寄塏兒再疊前韻

華亭有唳鶴其聲聞玉京有子翎翮就飛和聲不平感
此思佳兒詩書勞經營敢云虎豹駒食牛氣還呈十歲
學小詩已作驚人鳴十二學古文欣欣木向榮有時敲
五字堅厚如長城可憐患頸癰身瘦神復清俯視同輩
兒笑如蒼蠅聲賴有賢繼母保求寸心誠前寄一封書
增我舐犢情詩書且高閣不必嚴課程神仙丹可成當
遣白鶴迎

寄冉錫玉嘉三疊前韻

吾甥年十六穎慧莫與京可憐幼失學文澗常苦平作
詩嚴紀律當若細柳營爲文貴高華當若星斗呈邇來
得此訣無復寒蛩鳴元氣漸充實如衛之養營猶憶別
我時洒淚歌渭城下筆得春氣山水爲之清培實使令
大定能宏其聲汝祖多忠厚汝父亦樸誠令子遠遊學
卓爾非常情千里有驥足九萬有鵬程好奏霓裳曲娉
娥應笑迎

師竹齋集卷四

師竹齋集卷五

蜀綿李鼎元墨莊氏撰

乙巳至丙午

古今體詩八十五首

初至西湖

憶從髫歲別南天
夢想西湖二十年
山水有情應識我
鶯花無恙又迎船
人從蘇白尊前輩
客向洪葛洪逋林逋證證
夙緣多少林亭增
勝蹟蒼松依舊占
雲巔

泛金沙港同人分韻得曉字

錢塘門外及春曉
一葉扁舟出林杪
山頭風送萬松濤
湖心雲度一聲鳥
却來沙港尋芳園
柳影低昂梅朶小

爲數遊魚目漸花驚起浴鷗頭屢掉二十年前舊遊處
牛磨陳迹尙了了悵望煙波若夢寐刻畫山靈知多少
爲言同人緩緩歸十里沙堤月初皎

步月至淨慈寺

冥漠西湖夜空濛水氣生樹團新月影人趁晚鐘聲寶
塔連天迴屏山與寺橫敲門僧入定驚起一林鶯

岳鄂王墓

落日悲風起淒涼上岳墳死生持大節社稷繫孤軍報
國真忘已含冤不怨君最憐檀道濟千古屈難分

宋御教場

一段八盤嶺三宮御教場岳家軍不用空自演紅粧

靈巖

出城望靈巖蒼翠已在目舟行四十里乃始至山麓策
馬度阡陌幽性狎麋鹿絕頂一振衣四面俯喬木雲歸
峯嶺暗日上澗厓肅太湖接天青芳草隨地綠感慨館
娃宮千古同一哭所以古賢王斲雕而爲樸

獅子林

亂石疊成崗橫斜一里長奇峯移艮嶽曲徑走羊腸樹
已千年古人猶隔代忙市城如可隱何必小滄浪

題詹茂才

應甲

春夢留痕卷後二首

一曲琵琶引鍾情我輩真烟花三月夢風雨獨歸人腸
斷尊前約歌殘扇底春新詩和淚寫讀罷暗傷神
緣薄真如此相逢不厭遲真娘猶有墓才子必能詩一
卷埋香骨千秋墮淚碑青山無限恨落日草離離

支硎山

支硎石作骨頂上覆微土老樹寄石隙盤根入地府古
剎山之腰飛雲壯棟宇危亭俯崖際曠望豁田圃我來
正三春遊人紛難數遊人願天晴農夫願天雨但得雨
知時不遊未爲苦

偕何判官雲峯馮丞薰亭茂才詹湘亭鄭芥園李

芑泝羅鳴九唐筠圃甘檠東吳道南同遊花山
姑蘇山水佳天池最爲勝林黑欲爭雲潭清不讓鏡鳥
鳴亭閣幽日出崖壑淨曲路喜客迷疎籬愛花映何子
有逸思長嘯魚出聽詹生多風騷折花自吟咏笑彼唐
生傲獨向危檻凭水中聞唾聲激流見髯鄭畫手甘檠
東摹景擬持贈馮吳各有態調謔互酬應老健有羅生
步與少年競手拍芑泝肩浩歌出危徑而我當此時陶
然醉初醒精神忽交通百靈紛相迎爲樂不可極茲遊
或前定殷勤語諸君莫枉一時盛

大風渡錢塘江

潮平浪不平風激一帆橫江面連城動船頭湧日行遙
天明海色大地走雷聲涉險奚爲者淒然警客情

曹娥江

孝女死何傷芳名與水長沙含朝日赤潮湧暮雲黃客
渡精神肅人傳波浪香可憐今父老尙爲伍君忙

越州雜詩

吳越甬東地梁時望海軍天文牛女次地利海山分莫
問十洲島空瞻招寶雲壯遊多不遂把酒悵斜曛
聞道四明好丹山赤水天雲中開戶牖洞外接神仙欲
去偏多阻重來或未然莫尋虞喜宅悵望北峯前

今日恣豪覽乘風塔上行越山多障海江水半圍城烟
戶清時盛春帆落照明補陀雲霧裏欲辨已忘情
地僻幽情愜江樓俯翠微海雲連水立山雨帶花飛嫩
笋春林美鱗魚夏日肥樂遊乘醉飽夜夜月中歸

遊雪竇二首

出郭緣山徑蒼茫曉色分鵲喧朝霽日人踏亂峯雲澗
水澆田便村農插稻勤計程原不遠午後一鐘聞
夜雨中宵住芒鞋旭日催山藏天外雪水奮地中雷夏
木千章合春茶遍嶺栽隱潭雖可愛難捨妙高臺

夏夜南澧舟中

夜月南澧路孤燈一葉舟人烟連水濶螢火帶星流風
靜蚊偏猛山空鳥亦愁酒酣頻擊楫驚散宿沙鷗

謁王文成公祠

一代真君子儒宗集大成良知惟續孟餘事亦觀兵山
鎖姚江水祠高苦竹城景行空有願俯仰愧平生

夜

暑氣消中夜清談露坐長微風吹酒醒殘月照人涼山
憶神燈現村憐鄰館荒故園歸未得無計出餘杭

雨

一聲雷出地白雨渡江來爰日翳還吐遙山暗復開樹

平雲作岸潮漲雪成堆客意疎慵甚新詩奈爾催

食楊梅

細核出蕭山珠光欲走盤當筵真却暑配我不嫌酸龍
眼空多殼櫻桃許並餐主人嘉定客猶惜荔支殘

聞周大司馬海山先生訃

天下推人望 朝廷重老成一朝聞溘逝十載感私情
巴水鄉關夢燕山故舊盟傷心門下士痛哭向孤城

盤壩

一壩界江川斜鋪石溜船舟真行陸地客欲上青天水
色清黃異輪聲左右旋夢魂驚乍覺盥漱俯流泉

紹興府

蜺蜺卧龍山鱗鱗萬家室勾踐之故都聲名尙堪述生
聚何殷繁人文特秀逸多官益多吏讀書更讀律君看
山會人半操申韓術遂令天下官到此借刀筆人輕棄
其鄉水性與之匹奔走南北船臨江酒氣溢緬想陶朱
富生計未爲失却笑文種愚貪功致斧鑕

梭船

梭船疾如梭江上織風波朝發麗水曲暮宿吹臺阿海
上乘槎歸不得嗟哉梭船奈客何

鷓鴣船

鷗鳥千百隻乘秋化爲船戲弄山江水遊魚驚投淵民
生萬事食爲天却看農事起棄之短籬邊

烏鵲船

羣鴉飛入水輕若片羽委舟子弄槳便巧以兩足抵破
浪蹴潮如兒戲朝游錢唐暮諸暨

舟發武林

三次出武林水行道彌苦天熱長無風江淺耿不雨扁
舟困泥沙動賴人夾輔竹篙尙無濟那復問柔艣遙憐
水中車江上哭田甫昨日水滿田今日如斥鹵江涸不
及岸車短焉足取君看前溪中無舟但網罟對此心慙

然滴淚濕厚土安得鞭睡龍乘雲下天府沛然作甘霖
稼穡始可睹天乎聽不遠感激輸肺腑

喜雨

好雨崇朝降青春望至今雷聲初破悶水氣已清心
國計南糧重天恩震澤深翻愁來過暴三日禱爲霖

課子當此時四首題何明府

世珩

四時課子圖

春水桃花溢農家叱牛疾力學如力田鹵莽報難必須
知天行健作勞心乃逸課子當此時一刻金千鎰
夏日長如年萬物暢生性花落實固堅根深幹益勁榴
火冒雨然蓮心出泥淨課子當此時囊螢正堪映

秋風萬寶成金氣，擅凝結不殖學。將落報之以滅裂黃
華，綻東籬幾人保晚節。課子當此時，涼月半窓雪。
冬日萬木摧嚴霜，鍊松梅冰堅。水有骨地凍草無，荻歲
寒失貞守。那待陽春回，課子當此時。樹立須奇材。

題何判官

遠昌

羣仙高會圖

天蒼蒼海茫茫，上有白鶴羣。翱翔朝遊崑崙暮，搏桑羣
仙高會時。徜徉或騎騏驎，或跨鳳凰。或採靈芝，或酌天
漿。雲者舟者，行者卧者，變化各異狀。仙風道骨，都昂藏。
雲峯雲峯，少年狂翩翩。霞舉神揚揚，薄人間世求仙鄉。
胸有慧劍，斷名韁。黃鵠白鷗之間，趺坐而執麈。羣仙共

訝來何方莊生蝴蝶夢已化惠子據梧形俱忘瀛洲何
洋洋三山崔巍海中央蜃樓海市浩無際秦皇漢武遙
相望仙源無路去不得嗟子何處覓慈航乃知雲峯初
不狂乘雲上下窮八荒洪厓接引安期迎將會王母於
瑤池朝玉皇於天閭視登瀛洲升玉堂有如雲泥參商
益信雲峯真可狂玉樹琪花看不盡但見尺素之中烟
波浩渺萬里長天蒼蒼海茫茫

得榴兒殤信

眼淚濕書囊童鳥竟早亡吾宗宜碩大此子異尋常親
老誰怕目妻癡恐斷腸卽今溫清闕敢學喪明商

七月三日立秋

他鄉歸未得，節序動相驚。
窓外梧桐葉，秋來旅客情。
小

涼貪雨色大，暑避風聲穩。
睡慚工部愁，吟孰戲呈

工部有七

月三日戲呈

元曹長詩

蠅

逐臭還趨熱，營營實可憎。
炎涼真有態，白黑竟無憑。
附驥飛何疾，鑽窓出未能。
遙憐霜節近，頑怯恐難勝。

題詹茂才烟波畫舫圖

君不見建安才子陳思王，洛神作賦追高唐。
君不見杭州太守白樂天，紅藕花中泊妓船。
古來名士類如此，傷

春豈必惟嬋娟嗟子懷才不輕試疎豪頗得米顛意桃
花流水送將歸楊柳依依繫春思春思遙連春水波湘
妃鼓瑟揚清歌道逢鴟夷握手笑五湖風月枕邊多吁
嗟乎安得此身如鷗鷺日逐仙人自來去

七夕後一日由吳門登舟之嘉禾

薄暮到江洲銀河淡不收百年悲七夕久客怨孤舟明
月灣前路清風涇上秋引人來去逐何日得歸休

錢唐江晚發

日暮上漁船錢唐水接天空中星斗近暗裏海潮旋秋
雨連江淨神燈遶塔懸不愁吳地盡又有越山川

七里瀨

七里灘頭水千秋有釣臺不從光武卧那識客星來同
調磻溪在孤踪石室開巢由箕顙志肯爲故人摧

自永康山行至夏河四首

穩坐籃輿去何須問險夷亂山雲上下細路石參差秋
藕田田熟哀梨處處垂方巖聞道好獨占壽山奇
山鎖寒雲密人衝曉霧開石梯霜露滑木葉雨風摧自
是秋多感寧非客誤來地高天漸冷野雀暮聲哀
陡絕桃花嶺高低不肯平路隨山角轉人逐水聲行九
折羊腸峻千盤鳥道橫記曾經棧險投足尙心驚

暫向荆坑住開窓醉濁醪水環衣帶細山列畫屏高暮
鳥投林疾與人索食囂小樓堪靜息未覺客勞勞

放翁亭贈曲魯瞻明府

阜昌

天涯作宰與誰同大宋才人號放翁不到劍南詩必少
未收河北憤何窮買文客正慚司馬直道誰當繼長公
聚散搏沙千古恨雪泥何處認賓鴻

石門洞觀瀑

白龍雲中翔取水銀漢傍水溢收不及一落千丈強雷
聲破地出雨氣連天長中遭石一激雪花霏微茫石門
洞天地道經頗能詳青芝產石田語或非荒唐我來逢

九秋淒淒風色涼
仙人隔珠簾欲語不得將
何以洗我耳
更願湔我腸
待我俗緣盡
結茅此山岡

重九前一日和裡溪壁間韻

秋山頃刻變陰晴
最是籃輿不易行
客裏又驚重九到
半林紅葉亂溪聲

桃花嶺竹枝詞二首

桃花嶺上花芬芬
桃花嶺下人紛紛
願郎但住桃花嶺
莫逐桃花嶺上雲

桃花如妾嶺如郎
問郎棄妾去何方
嶺上桃花若移得
妾願隨郎到永康

順風行

舟疾如箭破大波舟子拍手歌吳歌輕帆兩道挂天碧
一生弄船無蹉跎須臾風廻怨聲起却羨傍人歌聲美
順風莫喜逆莫愁風雲變態無時休

將發武林訪笠人不遇詩以遲之

歲月忙如客匆匆不肯閒一年南國地五度北新關秋
雨蒹葭外高人水月間可憐相待久但見鳥還山

遲笠人不至散步橋頭

主人何處是散步且尋詩樹遠鴉歸早橋低月到遲香
茶留客館燈火話舟師不見同吟友寒杯未忍持

秋夜夢禪堂用壁間燈字韻二首

枯坐渾無事真如入定僧
鼠窺當案果雞話隔窓燈
冷露常相逼寒蠅未足憎
疎櫺原不掩要看月棱棱

月色知無分秋聲避未能
子規驚遠夢促織戀孤燈
搜句苦難得遲人愁不勝
幾回疑剝啄誤我累宵興

辰偕笠人訪傳荔鄉和讀樹軒原韻

曉風殘月柳條條訪戴情
殷度小橋幾個星辰猶在水
兩行松桂欲干霄隔離人
似黃花淡落葉聲如白雨
翬壁上新詩吟未足朝陽
喚醒一枝蜩

盆松歌爲光南六兄作

千年蟠虬忽驚蟄乘風騰拏不可繫日暮雷霆轟擊來
縮向君家玉盆立枝幹杈枒搏秋霜亭亭六株如人長
委曲勁枝加約束層層鶴蓋相低昂吾兄光南有奇思
愛茲不惜萬錢致日來盆側遶千回月夜風晨輒一醉
豈無山松干雲霄孤直不受人折撓那若神物堪寶玩
貞心歲寒仍不凋昨夜雪深百草腐庭前獵獵門風雨
殷勤保護霜中根期君心與松俱古

獨酌

今朝直欲酒家眠獨酌真成李謫仙薄暮出門誰執燭
喚將明月載歸船

重過七里瀨

轉蓬隨飄風又過嚴陵瀨
人行三峽中帆落九天外
日暮猩猩啼哀猿挂霜枝
感此傷歲晚遊子歸何遲

建德歌

亂山西與青溪迎
恰當斷處置孤城
前臨險灘背富春
隔江一塔高崢嶸
城外戢戢泊漁戶
城中時聞逐猛虎
世無黃霸誰循良
虎不渡河居民苦

由金華至東陽

朝別八詠樓暮登天香臺
好山排南北松風四面來
畫溪何清幽花木屏中開
郭氏林何有遺跡但蒿萊
道逢

赤松子招我遊天台誓當從之去風雨相追陪安能長
跼踖勞勞困塵埃

東陽盆梅歌

東陽盆梅奇且幽根蹲虎豹枝蟠虬衝寒欲放未肯放
火齊綠珠綴枝頭年年充作苞苴物千盆遠餽向杭州
此物何關屬吏事乃以玩好窮荒陬歲久此地還成例
移花接木胥役愁吁嗟梅兮冰雪骨豈願逐熱辭林邱
精神抑鬱不得暢明月來照心含羞四夫肩一盆嚴冬
汗交流損折花枝遭箠楚人不如花人乃憂誰當告大
吏此物不堪相誅求積弊何當一清釐物安故土人田

疇物安故土人田疇含哺鼓腹樂休休

元夕舟中

久客又春風扁舟景不同
近人孤月白隔岸一燈紅
酒肆門猶閉燕臺信未通
雙親知健否定復盼歸鴻

茗溪大風

山風欲來塵蔽窓舟子收纜樹爲樁
清溪碧濤漲春雪綠竹截雲爆聲裂
撼弄危巖巖忽飛壓碎隣舟人打圍
似有山精白日出怒欲斬之無劍術

施粥行

五更粥熟天欲明貧民招邀聚沙汀
手捧土罐攜兒女

一人一瓢不敢爭中有老媪年八十腰折眼昏難獨立
到遲反遭胥役罵餓倒廠門無人給窮民無告古已然
痛哭願得廠吏憐胥役無知故如此稽察不力豈曰賢
縣令聞之心惻然叱回胥役朴作鞭從此粥廠恩無偏
貧民一飽百無事捉蝨曝日頌良吏

題夏茂才深柳讀書圖得年字二首

科頭屹坐手殘編垂柳陰中住幾年一片夕陽聲細細
前身定合是鳴蟬

蘇髯妙筆在人間

東坡有深柳讀書堂刻

占盡風流五百年出地

一頭誰讓得會須重問大我仙

無錫謠

有錫兵天下爭無錫寧天下清微物何關治亂事古語
毋乃失其真又聞光武後此錫不復生唐宋元明多戰
征山不產錫何無靈惟有我朝洗甲兵萬年不負無
錫名

平山堂

守關竟終宵日出舟始放復聞金灣埧閘水不肯讓舟
中悶何似如魚在盆盎不爲平山堂咫尺列屏障初沿
城河行岸柳時背向北門一西折隱隱露青嶂梅泛一
溪香松搖百尺浪名花開未開春風日夜釀繫舟丹桂

根振衣翠微上爲品第五泉意與惠山抗低頭見揚州
始覺江山壯獨醉還獨醒此樂最難量

六開頭

日暮到金灣待開竟一宿開水行鹽船客船不許入鹽
船集數百客船集數千人聲似水沸星辰爲之顛平明
言開埧直待日卓午鹽船行何遲客船守太苦開水僅
數尺那得晝夜流立頃見其涸客與鹽俱留但見飢人
民哀聲號古佛不敢近鹽船盡向客船乞

渡黃河

前年渡黃河狂波浩無際今年渡黃河河窄流亦細借

問渡口人皆云旱所致爲指河之洲死尸相委積天旱
代無常 聖恩浩無地側聞東南漕救留十之二民以
食爲天施粥第一義胡有失食民道斃而野棄我欲清
其源惜不在其位

王家營

早投王家營饑民亦何多水藻及菜根價乃半雞鷺豈
惟半雞鷺匪此食靡他過客不須詫歲荒將奈何百金
買一車甘金買一騾君如買男女無錢許來過人賤不
如物感嘆淚滂沱

二月二日大雪喜而有作

一夜徐州雪平郊二尺高荒年人有命昨歲地無毛莫
漫愁春種先須醉濁醪僕夫憂路滑真是小兒曹

謁亞聖孟子祠

當年眞士是何人夢想東周獨愴神自有生民惟孔子
更無知已似慈親七篇書在淫辭闢百代功存浩氣伸
伊洛尙餘文武業遊踪那忍到西秦

送紹初歸成都應試

養士如養兵三年一大閱棘闢眞戰場毛錐卽寸鐵阿
弟從我來五年戶常閉技成鋒可試百試不一折今年
歲在午使者有常節槐花爲君忙柳條爲君別征衣爲

君買鞍馬爲君結送汝普濟堂將離轉嗚咽萬里獨行
難良馬有蹉跌眠食須保持行李自提挈亦知北闕便
嫌避正難決秀才有試例不在鬻官列父母倚閭望望
汝捷音切勗哉寶榮名行矣復何說

送家大人游浙

未語千行淚嚴親欲遠遊牽衣問歸日有夢逐行舟敢
恃精神健終憐道路修三男無一侍何以慰離愁

喜紹初登科

文章真傲命科第得傳人拾芥談何易穿楊技有神癡
情憐穉子樂意動慈親憶別無多日長安又早春

老父在江浙懸知望汝心捷書從此去歸思定難禁念
切期還卜歡餘酒自斟杏花風信近待汝宴瓊林

史詞

明季紛紛大木摧一時節鎮盡庸材可憐夜半傷心事

皇帝公然奉一枚

田雄
馬得功

江山剩有崎嶇險自撤藩籬實可哀天若再生周遇吉

賊兵寧敢渡黃來

姜瓖
白廣恩

二十萬人同日死將材如此未須誇最憐五日珍羞在

不及寒更一盞茶

洪承疇

清詩妙筆竟何如一代才華付子虛名士江南應不少

更無人敢作降書

錢謙益

一句千金猶不易頗矜直筆在詩人好名畢竟爲名累

祭酒居然列大臣

吳偉業

臯陶以後更無士約法三章不在多頗笑一身羅重罪

還矜刀筆似蕭何

王允熙

登萊處處是烟塵欲問英雄更少人空有頭銜資亂柄

何曾一日作明臣

孔有德
耿仲明

師竹齋集卷五